

Tgunsch vegn buc in rapport annual sperasvi da menziunar igl onn special 2020 signaus dil virus da Covid-19. Era tier nus ha quei fatg caschunau fetg bia restricziuns e problems. Sco organisaziun relevanta pil sistem vein nus stuiu prender special risguard.

PERSUNAL, SCOLAZIUN E PERFECZIUN

Suandontas personas ein vegnidas incorporadas 2020 ed han aschia completau igl effectiv da 93 (87) pumpiers:

- Berther Joel, Mustér/Sontget
- Deck Ben, Cavorgia/Sedrun
- Flepp Darius, Mustér/Clavianev
- Giossi Jan, Rueras
- Schnoz Lucas, Mustér/Sontget
- Venzin Claudio, Mutschnengia

Inagada dapli vein nus survegniu 6 pumpiers novs fidai ch'eiin prompts da s'engaschar e sescolar. Aschia eis ei stau pusseivel da mantener igl effectiv pretendiu, schegie che Tujetsch ha aunc adina memia paucs pumpiers.

Suandonts pumpiers han frequentau ina scolaziun el decuors digl onn:

- Flury Robin, cuors d'officier
- Tenner Gion, audit cuors da meinagrappas a Spiez BE
- Bisquolm Pierino, Fredy Caminada, Gion Tenner, Tomaschett Sandro e Zanetti Livio: cuors per program da scolaziun FUP

Ils ulteriurs cuors ein curdai ora ni ein vegni stuschai sin 2021. Ils officiers han absolviu lur sera da perfecziun a Mustér. El center ei il niev concept da scolaziun staus. Quel metta dapli peisa sil seracass local. Il medem mument ha il cantun introduci in niev program per planisar ils exerchezis.

D'impurtonza per la collaboraziun ei igl exerchezis sut l'egida dalla Pro Lucmagn staus. Bunamein tuts partenaris ein stai presents ed han exercitau in accident sil pass durant igl unviern. Il cuors ei vegnius menaus dils pumpiers e separticipai ein la Pro Lucmagn, la polizia, la sanidad ed ils pumpiers.

Il fevrer ei ina delegaziun stada presenta ad in exerchezis cantunal sil Pass Lucmagn, vart tessinesa. Las differentas organisaziuns han exercitau in accident da lavina. Nus vein astgau observar la lavur dils pumpiers da Blenio e Biasca.

Ils meinagrappas ensemen cul commando han astgau separticipar ad in exerchezis culla colonna d'agid Mustér ed han survegniu in'investa ella lavur dil salvament alpin.

En tut han giu liug 119 (129) exerchezis cun ils pumiers ni las gruppas specialas. Muort corona vein nus durant 2 meins buca saviu exercitar. Lentschatta october ei la GVG stada presenta cun siu indrez mobil a Mustér. Tuts pumpiers han giu la caschun d'exercitar il stizzar sut cundiziuns realas. Per l'emprema gada ei vegniu fatg il test da schurmetg da flad per tuts pumpiers.

SERACASS ED INTERVENZIUNS

2020 vein nus giu in niev record d'intervenziuns. En tut ein ils pumpiers vegni clamai 75 (44) gadas. Ils motivs per tontas accziuns ein la schitgira dalla stad e silsunter las malauras, fiugs ordeifer fueinas ufficialas, la biara gliued cunzun durant la stad en nossa regiun e la nova incarica pil Salvament Surselva 144.

Ina sfida tut specialmein greva ei per nus pumpiers lu, cu personas vegnan per la veta. Deplorablamein ei quei stau pliras gadas il cass. La discussiun ed il bien spért da team gidan a surmuntar tals cass.

Ils 9-5 ein in balcun ed ina stiva barschai a Sedrun. Ils 3-10 ein plirs elements stai in accziun muort las malauras che han periclitau cunzun ils uclauns da Dieni e Cavorgia. L'interruptiun dalla via cantunala denter Mustér e Curaglia caschuna era a nus gronds problems. Malgrad che la via sur Stagias era il medem mument buca passabla, ha igl Uffeci da construcziun bassa procurau che nus vein da tut temps saviu passar per aschia era garantir la segirtad en Val Medel.

Durant il lockdown vein nus repartiun gratuitamein per l'Apoteca Desertina rodund 100 pachets cun medicaments, cunzun en Val Medel e Tujetsch.

En tut vein prestau 901.63 uras (528.90 uras) lavur d'intervenziun.

diember	sort d'intervenziun	uras
30	survetschs per 144 e tiarzas personas	131.70
13	incendis	194.60
9	alarms da centralas	92.00
7	agid tecnic	66.00
6	diversa	32.50
5	donns elementars	309.30
3	intervenziuns ABC	37.00
2	accidents da traffic	38.53
75		901.63

PREVENZIUN E PLANISAZIUN

El sistem d'intervenziun vein nus saviu optimar differents plans d'intervenziun, denter auter il concept da segirtad per la Residenza Dulezi a Sedrun ed il Camp Vacanza a Selva. Ils plans per il Resort Catrina ein medemamein terminai. Ulteriurs plans ein vegni adattai.

Ils responsabels pil Pass Lucmagn han elaborau cun nus il concept da segirtad pil Tunnel Scopi 1 e 2. Ussa suondan las lavurs pil tunnel 3 e las installaziuns da segirtad.

VEHICELS E MATERIAL

Tier l'intervenziun duront in grev accident ei il bus da persunas da Curaglia vegnius donnegiaus. Ina reparatura rendeva buca pli, aschia ch'il vehichel vegn remplazzaus 2021. Era igl auto-cistiarna da Sedrun vegn 2021 surluvraus cumpletamein. Il vehichel da prest 30 onns vegn revidius. Nus essan sedecidi per ina revisiun perquei che vehichels da tala dimensiun ein scarts sin fiera. La part davos vegn remplazzada cumpletamein, aschia era la pompa. Il vehichel sesanfla dapi la fin december a Linz en revisiun. Miez 2021 vegnin nus ad astgar prender encunter omisdus vehichels.

En connex cul Tunnel Scopi ha il cantun furniu in ventilatur a gronda prestaziun. Sper la lavur els tunnels porscha quel novas pusseivladads da cumbatter fiug. Ei setracta dil 6. ventilatur grond en nies cantun. Niev vein nus medemamein la pusseivladad da producir spema leva. Cun quei sistem sa cunzun vegnir cumbattiu fiug enteifer baghetgs senza caschunar pli gronds donns.

Nunspitgadamein vein nus giu reparaturas pli grondas vid vehichels, la gronda vid in cilender digl auto-scala.

La Vischnaunca Tujetsch ha terminau sia carta d'intervenziun – in impurtont instrument pils pumpiers en cass da malauras – ed ha surdau quella als pumpiers gest avon Nadal.

Per la Viafier Matterhorn Gottard vein nus construui ensemen culs responsabels in carr cun material da pionier. Cun quei material eis ei pusseivel da segirar carrs da viafier disviai.

OCCURRENZAS SPECIALAS

Ils 11 da matg han 8 giuvenils dalla Cadi frequentau in di da fuffergnadi tier nus. Giuventetgna Cadi ei l'organisatura dil di. Duront pliras uras han ils giuvenils survegniu in'investa da nossa lavur e nossas incaricas.

Era ils affons dil pass da vacanzas ein stai tier nus duront

la stad e gest avon las vacanzas d'atun vein nus saviu honorar ils affons da nossas vischnauncas che vevan giu gudignau la concorrenza da designar cun in miez di tut special tier nus.

El rom d'in exercezi essan nus sepresentai a nos hospes da vacanzas dil Catrina Resort. Deplorablamein vein stuiu stuschar l'occurrenza cun proprietaris da secundas habitaziuns sin 2021.

SHUTTLE 144

Suenter ch'il Spital regional Surselva ha surpriu il salvament ella Cadi essan nus vegni dumandai schebein nus hagian la pusseivladad da segidar. Aschia surpren ina grupp scolada aposta per quei survetsch dapi il zercladur 2020 il survetsch d'ambulanza naven dalla sera allas 18.00 uras entochen la damaun allas 08.00 uras. Il survetsch ei patertgaus per cass grevs ed ei cumbimaus culla REGA ed ils miedis da casa. Grazia a quei engaschi eis ei pusseivel da garantir era duront la notg in agid professional entras nos miedis ed il survetsch da salvament. Ils pumpiers involvi vegnan scolai periodicamein entras il Salvament Surselva. Lur pensum ein cunzun il transport ed il sustegn dil miedi sil plaz. Ils 7 pumpiers ein suttamess al secret da miedi ed ein engaschai dil Spital regional Surselva.

ENGRAZIAMENT

La fin november vein nus mintgamai da prender cumiau da fideivels pumpiers. Gest 4 persunas han saviu retscheiver la biala ura da crap-scalegl: Roland Cajacob, Victor Flepp, Otmar Lutz ed Otmar Venzin per tut lur survetschs duront ils 25 onns. Ursin Schmid terminescha medemamein siu survetsch, quei suenter ver fatg dapli onns che pretendiu. Sco successur ei Riccardo Monn vegnius eligius ed el representa la vischnaunca da Tujetsch. Ulteriurs pumpiers ed ina samaritana bandunan nus per motivs professionals ni persunals. Ad els tuts engraziell jeu per tutta lavur prestada.

Igl engraziament va era a tuttas persunas en survetsch: seigi pumpiers, samaritans, politichers, partenaris e responsabels dad uffecis che collavuran, s'engaschan e segidan duront in entir onn per garantir in survetsch da segirtad per nossa regiun.

Corona ei pliras gadas stada enta peis a nus duront 2020. Mo il virus ha era purtau nus vinavon. Savens ha ei giu num improvisar e las sligiazions seicristallisadas vegnan era a survir pigl avegnir. Aschia vein nus entschiet plein speranza igl onn niev.

Informaziuns detagliadas davart las intervenziuns, l'organisaziun ed il menaschi dil Center d'intervenziun Sursassiala anfleis Vus sco usitau sut www.pumpiers.ch